

四庫全書

集部

欽定四庫全書

集部

鄧峯真隱漫錄卷十六
八至

詳校官庶吉士_臣李如筠

主事_臣呂雲棟覆勘

總校官降調編修_臣倉聖脉

校對官中書_臣張曾效

謄錄監生_臣徐汝雄

欽定四庫全書

鄒峯真隱漫錄卷十六

宋史浩撰

表

謝除開府儀同三司表

便朝賜對已叨臨遣之榮上宰視儀更拜褒陞之寵懇辭
弗獲感涕無從中謝伏念臣確守性愚不通時變徒緣鼠
技獲久侍於潛藩親際龍飛遂克禪於初政每銜眷禮特

異臣工自知遲鈍之材不稱登庸之選亟求靜退獨賴保全假祕殿之隆名賦真祠之厚祿十更寒暑三被使令既以侍親畏邛邽九折之阪旋蒙改命懷會稽太守之章顧毫髮之亡竒愧旌旄之濫受茲荷乾坤之造忽從苦塊之餘錫是南邦易之重鎮方齋心而入奏復躡等以加恩渙發九重秩均三事德既踰於望外感實倍於胷中雖竭尋常曷酬萬一茲蓋伏遇皇帝陛下治高千古澤浸四方立賢無黨以無偏念舊彌久而彌篤致此非常之殊遇亦需

投老之衰蹤臣敢不益勵朴忠力行素學教條期於戶曉
利言當以驛聞庶昭愷悌之風以廣醇釀之化

除開府儀同三司謝太上皇帝表

候藩假守方趣覲於便朝制綽䟽榮遽視儀於上宰懇
辭弗許兢懼靡寧

中謝

伏念臣昨任學官入對天陛亟

蒙獎諭遂冒除書屬建邸講席之虛自麟臺兼員而授
每銜寵數悉本隆知夤緣三歲之餘遭值千齡之會重
華協帝次輔秉鈞戴恩已重於丘山圖報未聞於毫髮

頃因郡寄旋處家艱自惟溝壑之必填敢意竹符之再
畀逮趨嚴名叨被洪私矧三事之崇班實一時之異數
宜伊猥瑣輒此僥踰茲蓋伏遇尊號太上皇帝道運冲
虛仁施溥博俯念蓋帷之舊物嘗依日月之末光示以
褒陞賁茲臨遣臣敢不益勤職守備罄忠忱綿力薄材
誓謹孔顏之學隆天厚地永依堯舜之仁

乞休致不允謝表

桑榆景迫當自列以引年天地恩隆訖未容於謝事疊

頒詔旨曲示眷私拊躬莫遂於循牆拜命竇驚於維谷

中謝

伏念臣起身孤遠遭世盛明識不足以察治亂之

機才不足以應事物之變徒因末學誤簡聖知無文武

之全材兼將相之重任爵高祿厚莫施橫草之功福過

灾生遂得負薪之疾儻復不知於止足必將自速於顛

隤故因七十之年不避再三之瀆盖期合禮實匪矯情

豈伊父母之懷尚軫蓋帷之念俾仍廩秩以養衰殘茲

盖伏遇皇帝陛下智日溥臨仁天廣覆練羣臣而數名

實治協孝宣濟大業而擥權綱道侔光武特加記錄未
許歸休蓋將存老馬以問途莫遣縱冥鴻之舉翮恩施
若此報稱謂何臣敢不仰體至懷務全晚節絲綸言出
未蒙反汗於今朝丘壑志堅尚冀乞骸於異日

謝除少保醴泉觀使侍讀表

皇恩至渥固辭雖切於循牆溫詔疊頒成命莫回於出
綉凌兢祇拜偃僂難勝中謝竊以老棘聯班職參寅亮
邇英進讀選號清華矧領使於祥源仍冠名於書殿邑

封萬戶國列上公是皆極儒者之至榮所以示輔臣之
優禮豈容孱陋并有超踰伏念臣學術既老而益荒材
能已試而罔效徒緣際遇久玷簡知戴恩實重於丘山
論報蔑聞於絲髮捫心自媿視已無堪固嘗知止以引
年迺復疏榮而越等惟茲異數斷自淵衷豈平生志願
之敢期實晚景遭逢之過分茲蓋伏遇皇帝陛下量包
細大施等初終立賢廣而無方念舊久而彌篤俯眷桑
榆之晚曾陪簪履之餘特示寵恩式彰眷遇臣敢不粗

殫未技誓守朴忠雖聖學高明本不勞於誦說而天威咫尺尚得奉於清閒

除少保醴泉觀使侍讀謝太上皇帝表

視秩公槐久媿祠庭之尸祿聯班孤棘遽叅經幄之侍言荷寵渥以非常控懇詞而弗獲雲天拜施淵谷懷驚

中謝

伏念臣奮自寒鄉出偶休運橫經壁水茂著聲稱

錫對楓宸亟膺獎拔乃克員於秘府俾侍學於潛藩幸逢舜德之重華遂忝漢庭之次輔退閒直館載昇郡符

無將相之崇資竊廩稍之冗食凡茲僥冒皆昔權輿御
恩雖重於丘山顧已已衰於齒髮蓋嘗力上挂冠之請
豈意更叨出綽之榮矧亞保叅寅亮之司而邇英極清
華之選峻名書殿領使祥源邑封萬戶之多國列上公
之重何曾病質輒玷殊私茲蓋伏遇尊號太上皇帝道
運難名功成不宰曲軫蓋帷之舊曾依日月之光示以
優恩華其暮景敢不粗殫末技益守孤忠入告嘉猷無
負六經之訓仰酬大造永依二帝之仁

謝除右丞相表

揆席久虛，咸儀非常之盛。舉旰朝誕告，遽先已試之陳。人雖力控於忱詞，終莫回於淵聽。凌兢拜命，偃僂懷慙。

中謝 伏念臣才不逮中識，難語上蚤。受知於德，壽旋蓬

迹於道。山王邸橫經，諸闈庀職。適際明昌之運，叨居輔弼之司。自揣無堪，亟求置散。去國十五年之久，壯志益凋。還朝三數月之間，沈疴屢作。方上歸休之請，忽膺圖任之榮。覆餗是憂，循墻莫避。此蓋伏遇皇帝陛下，乾坤

覆育父母矜憐德以行仁急親賢而愛物人惟求舊每
藏疾以匿瑕遂使疲癯復當委注臣敢不彊親藥石期
緩桑榆顧乏寸長敢替舉賢授能之志誓持衆美覬迓
揚已取名之譏

除右丞相謝太上皇帝表

徧歷華途昔受知於神聖再陳揆席今進冒於恩榮揣
愚分以難堪信夙緣之有幸逡巡莫避感懼交深中謝
伏念臣本起寒微素無援助自充員於學省獲奏對於

宸庭誤簡隆知亟躋清選久棲遲於鶴禁俄際會於龍
飛上契淵衷擢陞次輔旋求歸於田里期必志於江湖
豈意暮年更膺迅召官窮祿厚初無橫草之功心勦形
癯徒抱采薪之疾茲復青氈之舊物仰銜丹扆之殊私
揆厥所源知其有自木繁枝葉植本惟深水壯波瀾流
源蓋遠凡此過優之寵悉由資始之恩德重天淵報微
涓露蓋茲伏遇尊號太上皇帝道傳萬古聖冠百王玩
意紫清非心黃屋務兼懷於南北格大順於高卑授舜

八元遺湯一德致茲盛舉猥及陳人臣敢不勉竭疲瘝
思酬知遇聖圖廣大倘有補於萬方慈極尊安冀無窮
於億載

生日謝賜牲餼表

戶列桑蓬方慨先親之顧復驛馳綸綍遽頒內府之旨
嘉驚異數之便蕃重微衷之跼蹐

中謝

伏念臣猥緣攀

附頓冒寵榮去國僅十五年忽蒙收召來朝已三數月
茂著功勤每懷素餐徒煩亟饋敢意賤生之日大賜養

賢之亨茲蓋伏遇皇帝陛下覆育無偏生成有素式修
舊典下逮具臣坐增私室之光共侈盈庭之賜捫心知
幸荷眷益隆臣敢不砥礪孤忠要期厚報劬勞在念悵
無路以遺羹銘刻不忘敢有心於食志

弧矢開祥已負四方之壯志酒餽亟饋忽疏九陛之隆
恩祇服寵章彌增慙汗

中謝

伏念臣自依光於日月荐

承乏於鈞衡報殘消塵恩深海嶽曾未知於死所偶及見
於生朝方懷顧復之先親敢覲旨嘉之厚禮覲顏拜貺

雪涕知榮茲蓋伏遇皇帝陛下體貌邇臣修明故事不
問衰殘之晚景特頒飲食之芬馨遂令尸祿素餐之人
并受醉酒飽德之賜臣敢不虔恭嚴命滋味至甘珍旨
益豐悵無復南陔之養升恒圖報願載歌天保之詩

進玉牒謝加食邑轉官回授表

鉅典告成丕昭懿鑠清朝第賞猥及微臣真祖既衍於
圭畬褒秩仍覃於姻族拊躬祗命舉室生輝中謝伏念
臣本無經濟之長徒有遭逢之幸施踰山嶽效乏絲毫

萬戶疏封日負素餐之懼一門被寵居懷世祿之慙於
赫聖皇紹隆期緒派靈源於列祖益茂本支崇賞牒於
昭陵期躋仁壽乃嚴載筆甫及奏篇惟帝念功賜舉陞
遷之律顧臣何力與蒙獎錄之榮矧加地無異於進
階而貶恩亦均於拜賜曷為異渥併逮私庭茲蓋伏遇
皇帝陛下敷澤過優施仁從厚念臣濫陪於輔弼不廢
彝章謂臣適總於綱條莫回成渙叨踰已極荷載難勝
臣敢不砥礪初心激昂末路滿盈是戒敢夸稽古之能

報稱若何惟勵教忠之節

進玉牒加食邑并轉官回授謝太上皇帝表

敬宗尊祖聿觀鉅典之成錫命貶恩併示私庭之寵懇詞
弗獲跪受奚勝中謝竊以慶衍金枝推本源於炎緒光

垂寶牒備德業於仁皇於昭萬世之宏休茂闡兩朝之
盛美而臣偶承人之叨預宰司振領提綱雖總纂述之
職懷鈇抱槩初無潤色之工迨及奏篇例膺褒律榮秩
既延於嗣息真祖載益於土田顧今恩渥之加皆昔權

與之賜茲蓋伏遇尊號太上皇帝默觀昭曠高蹈希夷
堯道難名本親親而有叙文謨丕顯思繼繼以無窮且
嚴方冊之藏爰懋儒臣之賞致茲寵數猥及孱軀臣敢
不仰體洪私益堅晚節封踰萬戶既靡廩稍之豐忠萃
一門惟誓子孫之報

謝親屬差除表

餘生自幸既躡致於顯庸私屬何為亦併蒙於寵渥感
深淪骨涕隕交頤中謝伏念臣生歷險艱奮繇寒遠伶

傳千指久困躓於鄉關坎壈一身獨支撐於門戶始而
求仕本以為貧賞緣偶值於享辰僥倖載塵於宰路簪
纓相繼敢圖奕世之昌蕃廩稍既豐已獲全家之飽煖
頂踵悉由於覆育絲毫無補於聖明尚軫淵衷普沾河
潤宗姻內外盡叨進擢之恩閨閫賤良咸被疏封之命
一門改觀萬口欣傳豈平日志願之敢然寶暮景遭逢
之至此退惟忝竊倍極凌競茲蓋伏遇皇帝陛下施等
乾坤慈均父母濟物欲全其類愛人必厚所親乃眷衰

蹤特頌異數臣敢不益堅身教思振家風聚族而謀誓
永堅於忠孝自今以往求上報於恩榮

謝賜第表

任重難勝方控歸田之請恩隆弗替俄知錫第之榮仰

戴聖神終全覆露

中謝

伏念臣起身蓬華充位廟朝綿

力謏材無取棟梁之用頽齡朽質不堪斤斧之施幸久
託於帡幪遂偶逃於顛覆闔門寧處盡出生成問舍還
歸止祈罷免敢意淵衷之矐矐特頌廣廈之渠渠輪奐

光輝寵靈赫奕親朋情話昔嗟四壁之空老穉歡顏今
得萬間之比茲蓋伏遇皇帝陛下不遺舊物大擴皇
慈俯憐桑榆晚暮之途未免風雨震凌之患迺䟽寧宇
俾即安居絕勝寢丘已負叔敖之長慮未恢翔土更慙
去病之牢辭臣敢不仰銜蓋載之私愈誓捐糜之報考
工益宅肯招貪鄙之譏神武挂冠行遂棲遲之志

賜第謝太上皇帝表

鈞衡任重居慙瑣瑣之微材簪履念深遽錫耿耿之大

厦恩繇堯父賜出舜庭循分無堪拜嘉有愧

中謝

伏念

臣頃從學省獲造宸墀一言感悟於龍顏三歲翱翔於
鶴禁旋因攀附躡致顯嚴草木之茂蓋始培根宮室之
成厥由累土顧今辰之際會皆昔日之權輿蔭此華榭
銘乎丹腑茲蓋伏遇尊號太上皇帝功恢九有道並三
無雖玩意太初固已非心於黃屋而回觀邇列猶憐舊
物之青氈遂使併幪俯加愚陋臣敢不永依洪覆益勵
孤忠竊喜全家已絕風雨震凌之患尚期終老必殫珠

環報效之私

三朝寶訓終篇謝轉官回授表

大人繼明照四方志求軌範三聖相授受一道訓在簡
編披鉅帙以甫周眷私庭而申錫榮踰望表感溢情涯

中謝

伏念臣雖紹箕裘僅守章句始依乘於鶴禁旋際
會於龍翔西掖代言北門視草皆蓬爾英之末席日陳
列祖之成規卒因口耳之傳荐玷股肱之寄居慙固陋
力請罷休未容挂神武之冠仍許寓路門之直適逢今

日獲竟全書退朝弗倦於討論帝自樂此造理實由於
淵懿臣何力焉豈伊辭賞之餘復拜移恩之渥茲蓋伏
遇皇帝陛下學乃有獲尊其所聞自得於心靡俟輪扁
釋鑿之問坐進乎道迄如庖丁善刀而藏猶旌論說之
勞俾衍室家之慶臣敢不奉將眷命勉飭來昆發金匱
玉版之儲上已增光於洪業鑒塵尾蠅拂之戒下宜毋
事於清談庶寫忠誠少圖報答

正說終篇謝轉官回授表

進讀無功方控辭於美秩疏榮甚寵俄馳及於私庭退

省僥踰倍深兢懼

中謝

竊以真皇在御德性造微億萬

載之詒謀相傳以道五十篇之垂訓先正其心龜鑑陳

前盤孟示戒幸聖主茂緝熙之學俾儒臣殫誦說之勤

紬繹微言發揮治要竊慙謏問莫跂清光敢覲終篇例

叨信賞矧移恩於賤屬均拜賜於公朝雖謂彝章實昭

殊渥若為報稱深切感藏茲蓋伏遇皇帝陛下施等隆

天愛深察父澤必先於族及賞亦貴於世延遂令姻黨

之微遽被褒陞之眷臣敢不更相規戒共體恩私鄙桓
榮稽古之言徒為夸耀味孤突教忠之義誓有捐糜

進四朝正史志謝推恩回授表

史文登備錄總職之舊勞賞秩優加許移恩於私屬懇
辭弗獲榮懼彌深中謝竊以德厚功隆仰四朝之盛事

治叢業鉅煥十志之成書提綱允屬於元臣涉筆實資
於羣彥庸示纂承之懿有嘉繼述之工特舉彝章肆頒
褒律臣雖至陋自視何為頃載秉於國鈞適兼司於史

館積時寔遠微效蔑聞敢期鉅典之肇新遽望龍光之俯
及始控誠於軒陛旋畀寵於家庭仰惟聖造之曲成終愧
衰蹤之難稱闔門懷戴舉族增輝茲蓋伏遇皇帝陛下
恢廓仁心昭明公道施賞或容於延世酬勲靡貴於求
全遂令嗣息之微亦拜甄陞之賜臣敢不更相告戒共
保光榮惟孝惟忠思力圖於報稱若孫若子庶永託於
生成

丐歸不允謝表

投閒賜第忽致人言滙懇歸田荐膺聖詔未容遽去仰

戴隆知

中謝

伏念臣心則不他材無所取適遭盛際獲

遣邇班曾微毫髮之勞每荷聰明之眷退身揆路畀室

京都靜以掩闕軒卷可使之羅雀榮而及嗣子壻皆得

以彈冠雨露徧洽於一門風波乃生於衆口既無謀猷

以裨補大政徒然尸素以饕竊大官苟有浮言必污哲

鑑遂殫賤悃祈返故廬宸衷獨賜於眷留孤跡寧忘於

恐懼此蓋伏遇皇帝陛下天臨四海子育羣臣軫茲簪

履之遺曾偶風雲之會肆頒綸綍益固帡幪廣厦萬間
尚使萍蓬之棲止全家千指獲依日月之光明臣敢不
深安五畝之居仰副一人之意布在方策永彰清朝優
老之規貽厥子孫益勵昔人肯堂之志庶綿忠赤仰報
恩私

謝除少師表

辭榮未獲姑容粉社之歸錫命過優密亞槐庭之峻感
深淪骨愧溢汗顏中謝臣聞一心之臣有三千為治固

資於同德百里之行半九十盡忠惟在於晚途凜進退
之難全實古今之共歎悻悻或乖於大體栖栖多怵於
煩言惟臣畫繡之榮靡有秋毫之隙造膝力祈於休退
溫顏每示於眷留許解政機猶寘西廂之帷幄乞還鄉
邑更陞左棘之班聯假厯歲不除之官舉累朝甚盛之
典獲雍容而至此繁覆護之使然一時綸綍之傳薦紳
太息千載風雲之遇簡冊屢書顧臣何人幸甚過望茲
盖伏遇皇帝陛下睿謨廣大聖學淵微憐其久侍於清

先人惟念舊賜以即安於真館相亦克終肆推明恩昭
示殊獎及未嬰於沈疾使歸養於殘骸而臣自惟執經
誦說於潛藩以至當軸將明於初政凡同遭際悉已凋
零叢爾餘生巋然獨在驟遠軒墀之奉不知涕洒之流
橫草無功曷報乾坤之施食芹欲獻尚懷猷畝之忠

除少師謝太上皇表

指鄉粉而退處幸遂素懷冠孤棘以進遷遽頒宸渙辭
弗獲命凜莫措躬中謝伏念臣本乏長材偶逢休運當

紹興更化之日首被召除逮學省賜對之初亟膺加獎爰從冊府俾預宮僚曾無一得之愚可効萬分之補屬上聖躬行於揖遜實微臣適契於依乘甫閱期年躡登次輔出臨帥閫入侍經帷頃復預於鼎司顧曷勝於柄任力控歸田之懇俄為錫第之留寵光徧及於族姻眷遇迥加於倫等載惟瑣質久冒隆私疾疢交攻鄉闕是念已韋投間而遂志敢期增秩以疏榮佩恩典之過優覺歸途之增耀凡今際遇自昔權輿戴德至深隕身莫

報茲蓋伏遇尊號太上皇帝懋昭文德大擴克仁俯
念蓋惟曲示始終之眷肆加綸綍蔚為出處之光臣敢
不退即便安少休疲曳適山林之真性自樂餘年修香
火之勝因仰祈萬壽倘未填於溝壑庶復望於軒墀

鄧峯真隱漫錄卷十六

欽定四庫全書

鄧峯真隱漫錄卷十七

宋史浩撰

表

謝免明堂大禮陪祠表

肅雍顯相存勤尺一之頒汪濊湛恩曲貸再三之瀆恭承
開諭許即便安中謝伏念臣頃丐餘年獲歸故里方聖
主在帝左右有嚴奠璧之祠則微臣惟命東西敢告負薪

之疾屬沈綿之寢劇懼跛倚之難支與其顛仆自速於煩
言孰若哀鳴仰祈於睿鑒果荷曲成之造旋聞賜可之音
此蓋伏遇皇帝陛下父母愛憐乾坤覆載不責筋骸之末
示全簪履之遺君命不俟駕而行愧初心之有負海內各
以職來祭嗟膂力之獨愆徒與黔黎均霑惠澤

明堂大禮謝加食邑表

合宮藏事病莫與於駿奔宣室均釐恩遽霑於冗類控
詞不果拜寵為慙

中謝

伏念臣尚抱沈綿未經蘇息功莫

施於橫草錫屢侈於分茅惟能三年再舉於明裡始荷一
禮頻頒於嚴召既不獲祇奉璋執豆之役又烏可加方
田貢賦之腹何意空餐忽叨異數茲蓋伏遇皇帝陛下
德配天地功光祖宗合饗以歌成命之詩惠餽而霈蓂
蕭之澤不遺簪履特出綸絲敢不勉策筋骸恪勤香
火誓竭餘年之晼晚仰酬大造之穹崇

生日謝賜金器香茶表

蒲柳衰姿方軫勤勞之念絲綸厚施忽盼璀璨之珍下

拜凌兢旁觀欣豔

中謝

伏念臣猥緣攀附疊冒寵靈去

國再歷於星霜思君每勞於夢寐敢意賤生之日曲分
燕具之榮間飾寶珠密排金粟成此樽壘觴豆之器副
之槍旗龍麝之芳豈伊環堵之間獲侈盈庭之賜矧昭
回宸翰熙然三月之春寂寞孤蹤頓若九鼎之重從天
而下揣已奚堪茲蓋伏遇皇帝陛下道大無私恩隆
不替收既遺之簪履賁垂盡之桑蓬臣敢不銘在丹衷
寶茲大賚光生塵席永無北海之憂報乏瓊瑤第祝南

山之壽

身登耄齒已預拜於慶儀時適生朝復遠煩於使命何
幸一年之內叨逢再錫之榮恩重報賒感深涕落

中謝

伏念臣殘庸有素樸拙非材徒以潛藩罄此心之愛敬
遂當初政冠列辟以陞遷眷寵至隆臣鄰莫比逮乞骸
於既老亦賦祿於無功屆茲勞瘁之辰厚有便蕃之賜
煌煌多品歲歲為常每思何德以祇承殆是宿緣之際
會茲蓋伏遇皇帝陛下皇天降祐慈父興憐察臣犬馬

之衷始終守正謂臣桑榆之晚操履弗渝故頒御府之
珍竒用作私庭之光耀歡傳道路喜動里閭豈惟增賁
於一時抑亦永彰於千古臣敢不益知尊主不昧輸忠
雖膂力既憊覲功名而已遠惟精神之運尚香火以勤
修誓竭餘生上酬大造

星驛東馳錫上方之重寶華門下拜快故里之羣瞻榮

極報賒感深涕落

中謝

伏念臣材均樗櫟景迫桑榆徒

緣執卷於潛藩遂獲秉鈞於初政千慮殊無一得九遷

濫至三公身雖退而寵不渝年益高而眷彌厚乃歲歲
始生之日有煌煌成命之頒璀璨兼金光動彛尊龍勺
芬馨騰馥風生麝篆月團欣是叢珍萃于私室茲蓋伏遇
皇帝陛下乾坤覆育父母撫存憐其篤老之姿貴以肆
筵之具敢矜稽古實荷舊恩臣敢不愛敬輸誠升恒歸
美春朝秋覲莫陪漢殿之班暮火晨香第效華封之祝
使述絲綸北闕未忘於簪履賜盼薰茗南金併侈於樽
壘仰銜貴老之朝俯記賤生之日

中謝

伏念臣黃綠宿

世遭遇真人奏鼠技於青宮每蒙聽納翊龍飛於白水
函冒陞遷兩秉國鈞屢陪經幄迄無報塞終丐罷休茲
當射矢之朝方切蓼莪之感豈圖厚施忽耀私門此蓋
伏遇皇帝陛下育物等乾坤視臣如手足謂翼鱗之攀
附悉慨凋零顧湖海之退閒獨餘衰朽軫憐舊迹爰錫
叢珍臣歲歲霑恩人人健羨循涯自幸已踰中書二十
四考之期歸美輸誠第祝三皇萬八千年之壽

謝除太保表

引年告老本虞危溢之灾念舊推恩更拜優隆之命控

辭靡獲虛受為慙

中謝

伏念臣猥出名場寔階朝著潛藩

儲府首膺羽翼之求政路台司歷備股肱之選外總十
連之任中陪五學之遊至於推轂將壇侍祠仙館從容
別殿雲章俾預於賡歌寵賁賜廬神筆特新於扁榜凡
厚眷殊私之下逮有宿儒耆德之未嘗而臣迫鐘漏之
將殘視桑榆而永歎櫪驥之心徒在顧力弗支芻狗之
迹已陳不歸何待輒披懇悃仰叩凝嚴謂昔之壯猶不

如人曾事功之蔑著且及其老戒之在得寧寵利之敢
居幾至瀆煩始蒙開許惟三公就第之異數實累朝信
史之罕書旒節不移蓋循國老之故事苴茅愈重至用
勲臣之舊封顧臣何人可以堪此茲蓋伏遇皇帝陛下
仁參天地道合祖宗三千咨同德之臣方共扶於興運
七十遂告歸之志俾獲保於餘齡致此光榮萃于衰荅
揮賜金而具酒食已均惠於親朋垂安車以示子孫尚
教忠於苗裔

除太保謝太上皇帝表

神武挂冠方致為臣之事
昕庭出綽更升論道之官
始終備極於叨塵俯仰不勝其愧忤

中謝

伏念臣奮由寒

遠獲際聖明賜第太常當撫運中興之日
執經儲禁適倦勤內禪之時
絲毫盡出於生成卯翼遂躋於通顯闕
然莫報老矣奚堪惟當自力於廉隅
尚可少裨於風化危衷屢啓優詔
俯從顧進退之際裕如皆培養之恩
抵此微軀易殞洪造難酬茲蓋伏遇
尊號太上皇帝博大

真人聰明元后遊心於淡而合氣於莫齋居方即於廣
廷臨下以簡而御衆以寬家法乃傳於聖嗣曲憐舊物
俾返故鄉給傳俸於納祿之餘覲嚴宸於乞身之後眷
此衰年之垂盡尚膺異數之非常臣敢不推本權輿圖
回報答當令孫子誓殫犬馬之忠尚覲桑榆永賴乾坤
之賜

除太保謝詔許入謝表

納祿冀還於初服乃叨公衮之除歸田宜老於故鄉復

造宸墀之謁洪私特異衰涕交零中謝竊念臣器窳德
輜地寒材薄曼容至六百石而去實有夙心張良蒙三
萬戶之封非其素望偶繇禁附濫汚弼諧頂踵之外皆
出生成涓塵之報莫能表見覺殘骸之難彊慨餘日之
無多及未填溝壑之間上願挂衣冠之請敢謂聖慈之
念舊更窮人爵以疏恩綸言既辱於廷揚鼎餗仍容於
家食至於遠稽汗簡荐降璽書許扶瑣瑣之孱軀來覲
葱葱之華闕曠盛儀於百歲軻後無傳新寵命於一朝

愧今為始茲蓋伏遇皇帝陛下高旻覆幬赫日照臨眷
同陪潛邸之具僚巋然獨在使再望清光而退隱久有
餘榮臣敢不節中以盡桑榆垂車而示孫子驥老伏櫪
徒慙芻秣之施孤正首丘永畢山林之志

謝賜御書明良慶會閣牌表

睿藻宸章方珍藏於漢第璇題寶畫復榮動於周行拜
稽首以揚休涕交頤而自感中謝伏念臣材如樗散福
若羽輕風波備歷於畏途每虞顛覆毫髮不逃於聖鑑

迄賴保全已容退處於丘園尚俾暫瞻於軒陛恩光優
渥好賜頒仍史冊至於屢書都人謂之創見矧茲層閣
之建皆本厚祿之餘爰仰徹於凝旒遽俯頒於扁榜翔
龍翥鳳已勤神筆之褒崇塗碧填金更出上方之摹刻
明固赫然在御良亦昔所願為顧二字之寵嘉實一時
之慶會唯臣弗稱承命懷慙茲蓋伏遇皇帝陛下道冒
羣倫德隆邃古天無私覆豈特光孤跡之歸相亦惟終
蓋將貽萬世之法廣求故實益契眷私臣猥以衰殘親

逢希濶配河洛圖書之秘傳示無窮偕東南山海之靈
護持敢怠

年八十謝賜慶壽儀表

一人慶治正欣仁寺之同躋八袞衰蹤亦賀康寧之敷
錫敢希睿藻遠賚慶儀奉內府之珍竒激中扃之感懼

中

謝伏念臣起身寒素遭世盛明依乘偶會於風雲遇合
適符於魚水力未施於橫草位遽叨於面視雖景逼桑
榆獲遂挂冠之請而眷深簪履每興當宁之思時頌親

札之丁寧歲有生朝之賜予矧今厚意復示殊恩貂璫
飛鞚於川塗翰墨騰光於龍鳳謂臣浮生之希有又遇
十春祝臣暮齒之再延俾逢千載杯盤羅列盆盎錯陳
率皆粟縷於蕪金况乃環裝於百寶分上方之清馥輟
正焙之靈茅顧惟窮陋之居曷稱便蕃之寵茲蓋伏遇
皇帝陛下乾坤長養父母憂憐自執卷於潛藩暨秉鈞
於初政撫存特異終始弗渝稽古無功已愧於輜車乘
馬投閒絕望載新於龍勺彛尊臣敢不銘刻肺腑精勤

香火誓殫微悃祈歸美於升恒尚覲餘生觀凝勲於混

一

謝除太傅表

堯階劔佩已稱萬壽之觴舜殿絲綸忽峻三師之秩
瀝懇莫回於淵聽扶衰叅拜於異恩媿極駢顏感深雪涕
中謝竊以帝傳實久虛之位當處宗臣鼎司非序進之
資具存彝典加以官名雖舊朝著肇新昔猶次掌武之
聯今遂亞維垣之貴太上中興之際從權或賞於勲勞

陛下撫運以來重道弗輕於除授豈容疲懦乃玷寵光
伏念臣射策起家養親就祿偶出逢於盛旦遂馴至於
近班棘槐備歷於公孤衮鉞仍兼於將相中書二十四
考之紀僅比唐臣冠軍萬八千戶之封更踰漢世今者
已還初服尚預特招奔馳靡後於梯航蹈舞粗勝於簪
笏止可逭有司之彈劾何以當明詔之褒崇此蓋伏遇
皇帝陛下日月照臨乾坤覆冒謂虞庠之庶老猶被陞
遷矧代邸之舊臣寧稽惠澤曲加徽數申賁晚途而臣

無力可陳懷慙益切自知頂踵秋毫悉荷於洪私既挂
衣冠晝錦敢同於前輩誓殫惕厲仰報生成

除太傅謝太上皇帝表

玉卮稱慶方陪漢殿之趨金鉉疏榮幾極周官之貴維
時甚盛之禮推此非常之恩有覩在顏無詞叙感 中謝

伏念臣海邦令族黌舍諸生射策楓宸蚤錫大常之第
記言螭陛旋叨近侍之班會熙運之慕承預儲宮之攀
附任叨將相位至公師迨茲緝典之行亟被驛書之召

丹心許國悵莫著於事功黃髮在庭偶粗勝於拜舞觀
光則幸受寵何名茲蓋伏遇尊號太上皇帝博大真人
聰明元后壽為五福之首化日舒長山呼萬歲者三羣
心愛戴肆敷惠澤俯逮疲癯臣猥以微生親逢華旦尊
天子父進瞻寶冊之焜煌為聖人氓退竊里閭之安佚
誓殫惕勵仰對生成

進論語口義表

聖人之言如天豈容意度古者之學為已務在躬行逮

及漢儒傳注之興已失孔門淵源之舊况茲固陋何所
發明中謝伏念臣社櫟散材蠹魚素業窮年繼晷莫希
經術之名家析句分章猶有書生之習氣比歸休於故
里獲畢志於遺編念二十篇藏壁之餘皆七十子傳心
之妙雖迫桑榆之暮未忘鉛槧之勤再閱歲時粗終卷
帙揆分方虞於僭妄吐詞曷究於精微姑欲示於來昆
豈當祈於乙覽不圖眷獎許以冒聞茲蓋伏遇皇帝陛
下極圓神方智之能集內聖外王之道體堯蹈舜跨商

軼周經幄疇咨睿訓每宣於奧義詔書誕布羣臣莫望
於清光乃容螢爝之餘亦預芻蕘之擇恭承威命弗敢
固辭蠹測海而管窺天自慙卑近露增流而塵足獄何
補高明

謝賜玉帶表

請老而挂衣冠當返布韋之舊疏恩而錫鞶帶更叨瑤
玉之英雖知帝力之莫回誠懼臣儀之或紊懇辭弗獲
冒昧奚堪

中謝

伏念臣襁褓窮儒崦崦暮景遂白首故

鄉之樂已出生成從黃冠野服之遊始為宜稱敢意輟
內府無瑕之璞賁孤臣不朽之榮曷特異於兼金罪彌
深於懷璧茲蓋伏遇皇帝陛下仁孚動植道配堪輿念
千齡希闊之逢極諸老優崇之禮惟茲賚予尤越典常
元和之寵晉公本以討淮蔡逋誅之寇熙寧之賞安石
亦緣成河洮關土之功施及退休迥無倫擬搢笏有慙
於非據維鷄難遁於貽譏臣敢不銘鏤靡忘護持惟謹
東門祖帳雖歆豔於觀瞻南畝扶犁敢矜誇於佩服誓

殫惕勵仰答恩私

賜玉帶謝太上皇帝表

寶帶溫然出九天之錫賚祥光炳若快羣目之觀瞻居
深懷璧之憂莫遂循牆之避拜嘉增感過分為慙

中謝

竊以玲瓏其聲縝密以栗加而尊德尚為君子之珍束
以立朝尤劇人臣之寵非有顯昂之德望曷當璀璨之
身章如臣者躬乏清明體無蘊藉學未增瑚璉之器材
惟具砥珉之資荐玷通照實由大造雖體至隆之貺寧

逃弗稱之譏茲蓋伏遇尊號太上皇帝仁掩瑕疵信昭
孚尹享多儀於萬國已登禹會之塗山頒玉瑞於諸侯
行闢舜封之北嶽憫此賤微之替履飾以特達之圭璋
臣敢不身佩天恩道存日用益殫忠謹復韋布之初心
更誓捐糜作瓊瑤之美報

謝再賜御書舊學二大字表

風雲齊會夙塵講席之下僚奎壁爭輝荐奉宸章之大
賜荷睿慈而甚渥揆愚分以奚堪祇拜凌兢回思喜幸

中謝伏念臣賦材庸鄙奮跡孤寒徒以宿緣親逢華旦
承洪恩而進陪鶴禁奏薄技以仰輔龍潛翼翼冲襟稔
一人元良之譽巍巍初政播二帝雍熙之和皆本生知
匪因師授乃自不居孔子之聖以臣濫比甘盤之賢撫
夫舊學之名畀于再相之日駕馬既膺於一顧敬帚遂
重於千金豈期歷過十期又復頒斯兩字謂曩傳草聖
猶未愜於淵衷而茲降珍函方改從於措法開緘煥昭
回之星漢拭目眩飛動之雲烟非繇軫記不忘安得垂

情如許顧惟再錫寶顯殊私徃作尤竒迥出王張之右
今書盡美更超顏柳之先春蘭秋菊之各擅清芬隨珠
和璧之皆為至寶豈敢取捨俱願襲藏茲蓋伏遇皇帝
陛下執古通今躋時極治德茂加於此矣臣何力之有
焉乃於恭默不言之辰每起故舊不遺之念致茲孱瑣
亦被寵榮臣敢不深佩品題益勤寅奉眷憐有素儻容
二本之並存保護無窮將亘萬年而不朽

明堂大禮謝加食邑表

戊申

天地祖宗之饗慶成於王者之堂山川土田之腴推廣
於聖人之德既牢辭而無路斯負媿以承恩中謝伏念

臣遭世明昌致身通顯乏濟時之勲業有尸位之叨踰

茲退處於里閭莫施勞於籩豆猶因敷錫獲冒寵靈廩

稍俸錢尚覩顏於拜賜戶租井賦敢狂望於加封茲蓋

伏遇皇帝陛下道格幽明仁均普率不間邇遐之異壤

靡分勞佚之殊途霈此鴻龐逮于癯老臣敢不仰銜大

施益恪微衷春覲秋朝莫遣漢廷之列晨香暮火愈堅

華祝之祠

除太師謝表

統承千載方推曠蕩之恩位冠三師遽玷褒崇之典控
辭弗獲荷戴奚勝中謝伏以臣奮迹單平際時熙洽高
宗召臣於更化之日自冊府而真宮僚壽皇用臣於紹
祚之初越從臣而升宰輔雖勉輸於忠蓋曾莫補於毫
分何德以堪二十四考更踰中令無功而受萬八千戶
又過冠軍適丁賜几之年始遂乞骸之請偶延殘息復

觀重明當風雷雨澤之布宣暨草木蟲魚而鼓舞而臣
精神已耄膂力既愆附翼攀鱗莫展依乘之效望雲就
日阻趨翊戴之班第仰觀德化之成不自意榮光之及
面槐益貴命眷愈隆節畀東陽國仍全魏增爰田之多
邑衍戶賦之真租豈平生志願之敢然蓋暮景遭逢而
至此踟高天躋厚地難酬覆載之仁臨深淵履薄冰曷
勝滿盈之懼茲蓋伏遇皇帝陛下建五皇極奉三無私
發號罔有不臧每欽承於慈訓禮賢唯恐弗至尤軫記

於舊人肆令衰朽之蹤猥被便藩之寵臣敢不捐軀以
報沒齒不忘赫赫民具爾瞻願實慚於往哲斷斷臣無
他技誓益勵於孤衷

鄭峯真隱漫錄卷十七

欽定四庫全書

鄧峯真隱漫錄卷十八

宋史浩撰

表

正說終篇再辭轉官表

誦真祖之微言甫周鉅帙第儒臣之信賞猥逮衰蹤方騰
懇避之章遽拜丁寧之詔未垂開可輒復披陳

中謝伏念

臣性本顓蒙學惟荒陋守古人之糟粕僅類齊侯熟上世

之典墳居慙倚相時殫一得覲補四聰及上玉音精義出
於意表回思管見愧汗溢於顏間曾謂微章亦叨進秩無
功而受有識為羞伏望皇帝陛下施廓乾坤明照日月儻
欲彝章之不廢宜徧及於羣英獨憐朽質之無堪難荐永
於異數亟收渙渥俾穆師言

第二表

洵貢需章謂誤息之已寢重申巽命迺愚款之未孚敢扣
九重以伸三瀆中謝臣恭惟大君在上八柄無私賞雖貴

於均平義合分於隆殺高者抑而下者舉得天之權滿則
覆而虛則歌鑿物之理豈容濫分重冒殊私竊念臣頽然
投老之身偶有逢辰之幸居慙尸素絕意僥踰方期得謝
以言歸少延視息若更無厭而受寵必速災殃伏望皇帝
陛下秉惡盈好謙之心明哀多益寡之義特矜衰跡免畀
洪恩儻令止足之風粗昭末節當効捐糜之報庸畢餘生

正說終篇辭轉官回授表

恩典優隆力祈追寢訓詞深厚未賜矜從敢伸傴僂之誠

仰瀆崇高之聽

中謝

竊以聖主司名器之重賞必量勞人

臣惟義命之安分當知止蓋一已獲叨於仕祿則全家
皆被於寵榮既謂固功難勝異渥敢因固避遂及後昆
施雖廓於雲天懼實深於淵谷而况臣自歸相印載侍
經帷當累朝信史之告成逮三聖寶訓之竟讀皆承渙
命改畀私門顧歲月之幾何曾毫毛之未報更令濫得
愈切懷慙伏望皇帝陛下洪造無偏至明旁燭俯諒驚
危之悃亟布俞音庶容辭受之間終迓清議

進四朝正史志再辭推恩回受表

大典光華增渙祖宗之勲烈洪私溥博徧均臣下之勤
勞顧濫吹以牢辭忽貤恩而下逮雖陳免牘尚闕可音
輒再犯於天威祈必矜於人欲中謝伏念臣頃以充員
在位濫尸作史提綱惟茲十志之成曾之一詞之措豈
期第賞例及經修既微載筆之功敢後循牆之避旋蒙
大造改畀私門蕭然多病之軀尚知難受叢爾後生之
嗣其又奚堪伏望皇帝陛下聖哲融明乾坤覆育念全

家之飽煖已荷生成則非分之寵靈併宜寢罷庶幾晚
暮獲逭顛濟

辭少師表

咸有一德靡效格天之勲惟茲三孤遂極二公之任既
許言旋於故里豈敢復冒於殊私輒犯大威罄輸微悃
中謝伏念臣稟資孱陋承緒單平逢太上於更化之初
濫陪駕序事聖主於利見之日獲際龍飛揆路再塵路
門三八至於輪奐賜休於甲第從容召見於內朝東壁

之光數臨蓬華總章之訪每逮翦菟恩榮申賁於私庭
錫勞殆無於虛月眇然薄技雖欲免奏以何施蕞爾孤
忠惟以不欺而報上迫於垂老敢此乞身辜負君親覩
慙面目顧無勞之可紀乃席寵之有加匪惟忝竊之難
勝實亦顛躋之是懼伏望皇帝陛下博詢公議俯察
危衷念其行世述遭寧忍貪榮而累國憐其秉心慙直
不於臨去而隱情收新命於有司仍故官而即路名既
遂而身退幸粗守於前聞福或過則灾生冀曲全於晚

節

第二表

狐首丘而遂願已戴生成鶴巢林以自安敢圖陞進輒
伸前懇仰冒至仁中謝臣聞明主法天理無私於近列
老臣持已義敢累於公朝儻知非據以必危其可畏威
而但已伏念臣崦嵫遲暮蒲柳凋殘告歸於不能勉彊
之時辭官於積有叨塵之後雖曰粗遵古人止足之訓
亦豈能蓋累歲貪戀之羞儻恃舊恩復承新渥一念既

忘於戒得百發盡廢於前功仰瞻穆穆之清光敢竭拳
拳之素悃伏望皇帝陛下皇明委鑒聖德垂慈念厥寵
榮皆出於乘風雲依日月之下久當廉退少見於先狗
馬填溝壑之前簡策有光桑榆多幸顧輸誠之甚切必
得請以為期

乞免明堂大禮陪辭表

景迫桑榆久抱漳濱之疾恩頒綸綍趣陪汶上之祠眷
禮有加震惶無措

中謝

伏念臣賦資凡陋逢運休明自

言返於鄉扮已倏更於歲館幅巾蕭散重尋雲北之舊
遊層闕岩堯徒有日邊之清夢茲獲叨榮而拜命即宜
扶憊以問途况七筵八牖宗祀之盛儀實千載一時難
逢之嘉會而臣偶乖輔養方困沈絲負斧宸以天臨雖
願瞻於睟穆執豆遷而星拱慨莫預於駿奔伏望皇帝
陛下哲鑒無私皇明委照特回成渙姑置衰蹤儻免道
途全餘生於今日誓彊筋力侍親饗於後郊

重乞休致表

冒帷幄之舊恩久尸厚祿迫崦嵫之暮景輒布忱辭中

謝臣聞以道事君者必謹廉隅敢昧於始終之節以禮

使臣者不專寵利務全其進退之宜豈有位首三孤齒

踰七十無復毫分之一事位坐靡滿溢之官崇以嘗屢請

於甫及之年其忍自欺於大耄之日伏況臣起由耕隴

嘗備鼎司壯而欲行之尚勲勞之蔑著老矣無能也

雖糜隕以何施唯力丐於陰藏可少安於涯分伏望皇

帝陛下乾坤覆育父母愛憐察臣實懷珠遇於聖時念

臣懼得貪聲於天下亟頌俞旨俯詢私誠歸印組於尚
方上旌旄於少府克全骸骨以竟桑榆鐘鳴漏盡夜行
僅守田生之戒功成名遂身退敢希老氏之言

第二表

羸老不支洊上挂冠之請眷憐未替亟頒出綍之音禮
當有陳義弗敢止 中謝 伏念臣初無才術偶幸遭逢寵
靈每愧於叨踰俛仰遂侵於遲暮年著金華之籍七十
有三功登汗簡之書萬分無一惟堅故里休閒之志助

成清朝廉遜之風若復貪戀恩榮逡巡歲月或怵迫於
杜門省愆之後或倉惶於易簣垂絕之時雖陳靜退之
辭不得已也若取止足之義豈其然乎仰惟睿鑒之昭
然忍使老臣之出此伏望皇帝陛下特回淵聽俯察危
誠念潛藩勸講之僚與初政弼諧之列凋零無幾疲繭
偶存發於獨斷之明畀以歸榮之命庶令晚末獲荷成
全錫曠地以廣蝸廬已戴帡幪之賜垂安車而光梓里
更祈垓圯之仁

辭太保表

挂衣冠而歸里實虞滿溢之灾發典冊以揚庭重辱褒
嘉之數敢陳丹悃仰冒天威中謝伏念臣學術荒唐器
資窳薄名場奏藝本期致養於偏親仕路隨緣初匪妄
希於高爵積叨塵於三紀偶度越於羣臣比以垂盡之
頽齡迫於難安之私義力祈休退茲荷允俞孰云得謝
之身乃踐久虛之位昔謂千載臣何幸而獨逢茲惟三
公朝詎宜於濫授至於申畀東陽之節進加全魏之封

併真腴厚賦之所增豈繇力薄才之可稱伏望皇帝陛下大明委照廣度兼容察臣屢瀆黷聰本懼漏盡鐘鳴而不止念臣若當槐列是為日暮途遠而倒行亟寢誤恩俾安末路王道正直庶無私覆之嫌化日舒長尚竊有終之吉

第二表

乞身暮景方諧得謝之榮出綍昕朝遽被若驚之寵懇詞雖切詔旨未俞輒瀝危衷再干大造

中謝

伏念臣資

慙辱瑣幸有遭逢位首三孤節更兩鎮曾靡年高而德
邵每虞福過以災生遂罄此心願致其事儻守本官而
得請亦循愚分以難安而况躡陞公爵之崇仍冒齊旄
之舊大名改國萬戶加封顧惟非據以疊承其可弗辭而
下拜伏望皇帝陛下察丹誠之至恪憫小器之易盈特
軫睿慈亟收成渙已欣解組深銜從欲之至仁終覲貼
麻盡寢惟行之異數庶令衰朽獲免叨踰

乞免郊祀大禮陪祠表

聖人饗帝孰不駮奔故老陪祠亦蒙驛召拜絲綸而匪
稱凜淵谷以懷憂控免未俞輸誠敢已中謝伏念臣桑
榆遲暮蒲柳衰殘荷睿眷之優隆獲耄齡之閒散素微
韞藉而體弱深畏嚴凝方嬰老病以人扶實難跪起儻
令跛倚而臨祭必將隕越以遺羞莫遂一行輒伸再瀆
伏望皇帝陛下大明委照宏度包荒俯矜犬馬之疲瘞
姑許田廬之休養感鬼神而輒前席悵此意之蕭條執
籩豆以從後郊誓及時而勉勵

辭太傅表

桑榆暮景方塊處以待終槐鼎充員忽序遷而錫命誕
揚明綍彌震危衷中謝伏念臣仕媿僥踰齒當耄耄顧
官資之甚峻曾績效之蔑聞位不期驕常懷歛退物禁
太盛况已滿盈比緣壽慶之將行首被制書而入覲均
高年而賜帛尚喜親逢陪列辟以稱觴尤知晚過敢謂
三事久虛之選乃用一階例進之文義則難安辭猶未
獲伏望皇帝陛下廓乾坤之大造回日月之至明稽參

典章重惜名器察衰蹤之疲恭止好爵之登崇必惟其人弗以論道為假寵之地姑與之邑亦廣恩於貴老之時

第二表

忱辭屢控聰聽未回敢干咫尺之威存貢再三之瀆必期孚允用息凌兢中謝恭覩熙朝告成慶典爰均歡於溥海乃誕布於湛恩天子必有尊方顯寧親之孝皇極賜之福尤先養老之仁然而位既不同禮亦當異四品猶

存於止法三公詎可以叙遷况臣退伏田廬久辭機政
假茲殊寵將以何功伏望皇帝陛下深軫鴻慈曲全孤
迹察其官難復進宜容獨越於尋章念其身已投閒不
使重貽於清議庶蹈有終之吉用安垂盡之年

辭太師表

係第二
辭表

誤恩控免輒瀝微誠溫綉甫頌未回淵聽敢忘一介荐
叩九閭中謝伏念臣才匪俊良老而衰蕭當上聖纂承
之日正羣賢升進之秋膺力愆而弗遑趨負宸之朝問

學荒而無以應乞言之詔逭官刑而則幸被冊命以奚
堪矧茲謝事之有年專欲投閒而避寵若再忝師垣之
峻是尚貪人爵之尊又况特以恩遷非繇德選不獨重
鄙悰之惴惴且將虞衆議之紛紛必得請以為期寧畏
威而但已伏望皇帝陛下鑒由喪之至懇畧反汗之小
嫌惟昭代循名責實之公儻許辭於異數在愚臣安分
知足之義庶無負於初心

第二表

纂洪緒於蘿圖幸逢興運冠崇階於槐位忽玷明綸既
揆已以靡安敢騰章而屢瀆中謝臣聞駢壻之鼎鷺之

量遇滿則傾榱桷異棟梁之資有隆斯撓儻非材而受
爵將過分以延灾伏念臣久荷殊私莫伸微報當無能
為之耄景處不必備之官聯閒散是宜功名何有唯深
競戰每懷覆餗之憂寧敢覬覦更冒維師之寵矧今慶
霈已許貶恩豈伊成命之頒亟拜真除之峻雖賞宜從
予益昭聖朝忠厚之風然實不副名徒重愚臣貪饕之

罪且四品尚拘於止法而三公豈可以序遷若遂充員
誠污初政故在衰遲而戒得尤當偃俯以牢辭伏望皇
帝陛下聖度興憐皇明委照體虧盈之天道抑召損之人
心仍畀舊班畢桑榆之已暮庶回新渥亦窮壤之無私

謝壽皇賜生日金并香茶表

戊申

王言綸布使驛星馳俯矜篤老之臣尚記賤生之日兼
金賜厚賸馥薰濃祇拜已還兢慙莫措中謝伏念臣衰
姿無取耄齒徒高每荷恩私不遺疇昔夢想常陪於閒

燕瞻依靡替於愚衷方聖神玩意於穆清適孱縵棲身
於田野寵靈愈渥補報何賒矧茲岵岵之悲正切桑蓬
之旦豈謂焜煌之錫遽臨寂寞之鄉族黨光榮縉紳歆
豔茲念伏遇至尊壽皇聖帝陛下天開淵度子育羣工
雖居黃屋以非心猶眷東宮之舊物致茲大賚猥逮陳
人論當年羽翼已成之功敢攀四皓資同里酒食相娛之
具願傲二疏唯歌天保報上之私益衍華封祝聖之壽
餘生感戴誓竭捐糜

桑榆晚景方慙厚祿之久靡弧矢生朝又拜蕪金之大
賚寶薰騰馥竒茗芳滋一朝併集於私庭百感皆形於
中曲中謝伏念臣歛崎可笑款啓寡聞頃持黃卷之聖
賢濫綴青宮之僚竊微言啓發屢幸沃心妙語褒嘉今
猶在耳輔成初政備竭寸誠魏魏聖治之獨隆寥寥孤
忠之自慰曲蒙軫記愈益興悲每丁生育之辰必需豐
濃之澤輶車卽路寶貨盈庭沉麝溢奩鎗旗出焙萃煌
煌之珍貺為歲歲之常規何以堪之不敢辭也茲蓋伏

遇至尊壽皇聖帝陛下儲神清穆玩志希夷知臣下之
勤勞不忘眷遇念年齡之衰邁乃錫光華族屬預榮播
紳仰羨臣敢不欽承至意益勵微衷事君能致其身已
愧魯論之語歸美以報其上唯歌天保之詩

蓬門六矢式臨生育之朝寶匣兼金忽拜珍竒之賜併
上方之香美為私室之光榮下拜凌競銘心荷戴

中謝伏

念臣迂愚末學朴拙微材偶膺高廟之簡知俾侍慈皇
之潛耀親扶日轂麗正天衢徐庀職於黃扉迺承顏於

朱邸逮陛下握符御極屬老成去國休官方疾疢之無
聊愧朝叅之有阻曲蒙聖眷亟遣使以趣行遂使孱軀
獲扶羸而入覬望雲就日拱手慰心一瞻八彩之秀眉
屢奉兩宮之清燕恩情款密錫賚頻仍茲方念於劬勞
忽下頒於珍異茲蓋伏遇皇帝陛下乾坤化育父母愛
憐體至尊念舊之仁霈盛旦維新之澤輶車即路寶貨
盈門龍焙新竒麝煤馨烈拜嘉甚寵懷感彌深臣惟有
銜此恩私常圖報答年齡已邁雖難免於筋骸心志未

衰尚克勤於香火

太上皇帝升遐慰表

慟發九重哀纏萬國奉諱之次慕痛何窮中慰大行太

上皇帝治極無為功成不有恢復大業措天下億千萬
載之隆平退避東朝享聖子二十六年之尊養奄遺壽
祿莫諭天心恭惟皇帝陛下愛敬盡情悲恫過禮躬曾
參匹夫之行率履不違全周武達孝之情追惟罔極願
徇邇遐之欲少寬推毀之懷

太上皇帝升遐慰皇太后牋

慟發六宮痛均九土奉諱驚怛無物喻云

中慰

大行太

上皇帝道妙希夷德參造化備嘗險阻復境土以興周
久積倦勤俾謳歌而歸舜曷意鼎湖之命駕遽聞椒禁
之纏哀恭惟皇太后殿下恩義素隆悲摧特甚願寬慈
抱慰聖君子職之供永鎮東朝副天下母儀之望

太上皇帝升遐慰皇太子牋

慟發九重哀纏萬國奉諱驚怛拊膺隕摧

中慰大行太

上皇帝黃屋無心蒼穹佑德繩其祖武已高揖遜之風
詒厥孫謀更立元良之本榮養宜安於萬載仙遊遽邈
於一朝恭惟皇太子殿下岐嶷天資仁慈世濟念含飴
之保抱興飲泣之悲思願寬丹宸之懷少抑重闈之慕

太上皇帝大祥慰表

欽昭舜慕日惟盡於哀恫稽若漢儀時適逢於祥禫靈
遊益遠痛毒難堪中慰恭惟皇帝陛下德埒湯文行過
魯閔雖孝思罔極美牆每見於晬容而禮制有終日月

不停於飈馭願遵達節少抑至情當宸宇以尊臨慰臣
民之瞻俟

太上皇帝靈駕發引慰表


大升戒馭廣內纏悲一人遣奠以扳號百辟衰裳而奔
餞中慰恭惟皇帝陛下稟天至性執古通喪當靈宇之
啓行悵嚴容之永隔無從扶護彌劇哀恫願紓至慕之
懷式介無疆之壽

太上皇帝靈駕發引慰皇太后牋

羽伏啓途龍輜就祖罄慈闈而增慕環率土以興哀中
慰恭惟皇太后殿下道茂含洪德隆輔佐悼上皇之靈
馭辭北內之宸居扳轍無從拊膺有慟願觀妙理用抑
至情庶迎六氣之和來享一人之養

太上皇帝靈駕發引慰皇后牋

靈輿就祖素仗戒嚴辭鳳闕以啓行罄椒闈而增慟中
慰恭惟皇后殿下德隆婦順孝格天心當神座之初遷
悼慈顏之益遠願遏哀思之切用寬聖慕之深



鄭峯真隱漫錄卷十八

欽定四庫全書

集部

鄧萃真隱漫錄卷

十九至
二十二

詳校官庶吉士臣李如筠

主事臣呂雲棟覆勘

總校官降調編修臣倉聖脉

校對官中書臣張曾效

謄錄監生臣甯汝櫛

欽定四庫全書

鄧峯真隱漫錄卷十九

宋 史浩 撰

牋

賀皇后冊命牋

顯膺玉冊正位椒宮禮備有司慶均無外

中賀

恭惟皇

后殿下天生淑德身率令儀朝夕憂勤而無私謁之心
夙夜警戒而有相成之道固已協符於坤德允宜登配

於乾元肆因龜策之祥占榮被禕禴之盛飾宮闈胥悅
廟社增輝臣久冒朝恩側聆國慶阻與懽呼之列徒深
鼓舞之情

賀皇后受冊禮畢牋

帝眷炎圖禮崇陰教播告四海歡呼一辭中賀恭惟皇
后殿下至德靜專柔儀婉淑進賢以輔君子崇儉以勵
外家翊聖且於龍飛茂英聲於椒掖承顏德壽兩宮每
見其歡心正位長秋萬國咸歸於母道膺茲寶冊允協

著龜臣久冒國恩欣逢慶典雖奉觴稱壽阻騰嵩嶽之
聲而竊食奉祠行被闕睢之化

皇后受冊禮畢賀太上皇后牋

帝立中宮悉繫慈訓家傳內治將嗣徽音寶刻肆頒人
寰胥慶中賀恭惟尊號太上皇后壽齊乾道體合坤元
助聖子以立家述淑女而為后禮行椒掖佳氣藹乎六
宮命出楓宸歡聲溢於四海臣奉祠良遠詣闕無因注
目層霄想簪裾而在列馳緘便置同燕爵以輸誠

皇孫生賀太上皇后牋

光華慶胄誕育曾孫僕景命於萬年動歡心於四表
賀恭惟尊號太上皇后虞嬪徽懿文母憂勤和氣薰陶
膺璇宮之眷佑休祥降格致玉葉之芬芳臣濫叨祠祿
之榮倍極愚衷之喜仰占乾象欣尾宿以增明遙想禁
庭沸鈞天而爭慶

皇孫生賀皇后牋

陰教內修夙懋椒塗之德圓靈上鑒益綿瓜瓞之祥慶

毓皇孫懽形海宇

中謝

恭惟皇后殿下躬葛覃之節儉

志卷耳之憂勤朝夕問安輔文心之孝養本支擢秀成
周室之宗強臣叨奉祠庭阻趨天闕皇皇之大已歌假
樂之章蟄蟄之多願繼螽斯之什

賀皇太子冊命牋

誕膺渙號肇正儲闈廟社有承華夷胥賀中賀恭惟皇
太子殿下元良天縱忠孝生知周室百男獨冠本支之
盛虞庠三善更資師傅之賢爰奉絲綸進專七堯羽翼

不煩於四皓規撫實自於兩宮郵命既行輿情大悅某
夙親規誨久荷恩憐觀少海之澄瀾雖莫與在廷之列
仰前星之景耀尚能同擊壤之歡

立皇太子賀太上皇后牋

肇舉徽章宏開儲禁惟宸衷之果斷實慈訓之丁寧
一札頒宣萬方鼓舞中賀恭惟尊號太上皇后體坤其
靜得一以寧志合上皇輔佐之勤夙著道傳聖子晨昏
之奉益隆厚巨福以如茨見長孫之主器神靈歡喜夷

夏又安臣荷寵奉祠乞身還里在廷稱慶雖莫預於鳧
趨擊壤騰歌誠不忘於鰲抃

立皇太子賀皇后牋

龍廷發號鶴禁凝祥惟國本之不搖實坤儀之有助歡
騰椒掖恩浹海隅中賀恭惟皇后殿下懿德承天深仁
毓物嬪於虞舜盡厥事親生此文王立為世子豈特衍
祖宗之慶抑亦繫夷夏之心臣身卧漳濱悵鴻恩之未
報心存魏闕喜緝禮之初成第與黔黎同茲蹈舞

皇太子受冊禮畢賀太上皇后牋

龍廷誕告鶴禁宏開惟定議於慈闈故克成於闕典

中

賀恭惟尊號太上皇后德符坤載體配乾元翼燕孫謀
將永隆於丕祚儲登世嫡遂親見於盛儀動喜氣於兩
宮溢歡聲於萬宇臣逃聞盛事夙荷隆私雖身處田廬
莫與奉觴之列然心存燕雀敢忘賀履之誠

皇太子受冊禮畢賀皇后牋

渙號誕敷震維肇建睿謨出中饋之贊顯冊慶東宮之

成喜溢遐陬歡騰大內中賀恭惟皇后殿下徽柔得性
勤儉持身婦道茂彰謹慈闈之問寢母儀夙著喜長子
之承祧光動前星波澄幼海新寶文於銀榜動喜色於
椒房臣職奉祠庭身居里閭莫遙駕鸞之衆目覩盛儀
第如葵藿之微心傾皎日

賀太上皇后加尊號牋

誕敷寶冊申衍徽稱大德得名方侈一人之慶中闈錫
羨同膺萬壽之祺自昔罕聞於今創見中賀恭惟尊號

太上皇后功高任如道配唐虞並日月明均照臨於四海與天地久贊化育於羣生壺儀夙著於柔恭子臧日隆於歡養爰修闕典增奉鴻名禴翟禕衣備享椒庭之樂金螭玉檢永彰坤極之尊喜溢神人慶綿宗社臣竊叨祠祿莫筮賀班觀竹帛所書七十載古人希有指松椿而並祝三萬歲慈母亦然

賀太上皇后慶壽禮成牋

福衍籬圖增帝齡之時億慶均椒壺表坤極之俱崇喜

溢兩宮恩覃萬宇中賀恭惟尊號太上皇后性資懿淑
道體靜專德厚無疆懋尚儉慈之寶化行自內助成揖
遜之風方高穹錫羨於堯年罄率土樂尊於文母宜挹
泰辰之祉茂凝寶歷之休四海九州永戴雲天之庇萬
有千歲式齊箕翼之長臣竊祿外祠逢時大慶效嵩呼
之祝雖阻習於漢儀歌燕喜之章覲有加於魯頌

賀皇后册命牋

顯膺宸命進陟彤庭配立自天肇正坤儀之位教形於

下咸知母道之尊喜溢寰區慶綿宗社

中賀恭惟皇后

殿下稟資溫淑處性靜專夙夜警戒而無私謁之心朝夕憂勤而有相成之道固已兼全於盛德是宜登配於至尊褕狄禕衣極宮闈之體貌金螭玉檢煥寶冊之光華陰教克修人倫咸正行見二南之化助成萬國之和臣屏跡田廬奉祠香火遙瞻闔闔阻觀日月之明第與黔黎均被乾坤之德

冊皇后賀太上皇后牋

帝立中闈悉繫慈訓家傳內治將嗣徽音動喜色於兩
宮溢歡聲於萬宇中謝恭惟尊號太上皇后德符坤載
道配乾元昔也憂勤而佐君子之思茲焉逸樂而享天
下之養念聖子久虛於壺政俾賢妃蚤正於椒房典禮
既行朝廷斯治臣奉祠於外詣闕無階注目烟霄想簪
裾而在列馳誠緘牘同葵藿以傾心

賀皇后受冊禮畢牋

慶衍皇圖治隆陰教諏靈辰於太史受顯冊於中官廟

社益尊人神胥悅中賀恭惟皇后殿下天生淑德身履
令宜蚤光輔於龍潛遂親扶於日轂久貳坤儀之位益
騰軒曜之祥黼座顯昂鏘純音於管磬椒闈婉淑新寶
刻於瓊琚喜動兩宮歡盈萬國臣奉祠里閤凝睇雲天
莫陪百辟之班第頌二儀之德

皇后受冊禮畢賀太上皇后牋

帝堯之傳帝舜治道盡循太姒之事太任徽音有嗣跡
符隆古慶衍皇家暨冊寶之告成溢華夷而交抃中賀

恭惟尊號太上皇后徽柔得性勤儉持身助聖子以成家逮淑女而為配著龜協吉既備禮於楓宸金玉其章遂增光於椒掖將見厚人倫於四海豈徒綿國祚於萬年臣叨奉外祠阻觀盛典仰占乾象欣軒曜之呈祥遙想禁庭沸鈞天而稱慶

賀太上皇后慶壽禮成牋

萬壽維祺齒方躋於七袞一人有慶禮爰展於九重當玉琯之告春適椒闈之受祉歡騰兩內恩浹八紘 中賀

恭惟尊號太上皇后夙蘊柔嘉式持專靜徽音合如厚
德承乾得三寶於老聃躬行慈儉嚮五福於洪範益享
壽康適當希有之年永介無疆之厯凡茲生息孰不光
榮臣舊里棲身沉疴滯跡欣逢大慶無從星拱以雲趨
第與齊民同效嵩呼而鼇抃

賀皇太子生辰牋

瑞靄春宮允正元良之本祥凝日觀聿臨震夙之期喜
溢楓宸歡騰鶴禁中賀恭惟皇太子殿下聰明英果濬

哲溫恭問寢過庭純孝精忠而備著際天極地陰功隱
德以潛符宜錫羨於高穹永同休於昌祚某恭逢盛
旦適守外祠奉東內之觴雖莫陪於簪紱祝南箕之筭
祈益茂於松椿

二

慶衍皇圖久正元良之位祥開青禁適臨震夙之辰萬
宇歡呼一音稱贊中賀恭惟皇太子殿下稟資忠孝毓
質溫恭海潤星輝慶吾君之有子離明震豫知帝祚之

無疆宜茂介於壽祺永齊休於宗社某叨塵祠祿阻遙
賀班遥瞻貳極之尊第致千齡之祝

三

天潢流慶本早正於元良日觀赫靈期甫臨於震育歡
騰紫闕喜溢青宮中賀恭惟皇太子殿下德性淵冲仁
姿玉裕風清鶴禁惟端人正士之與居晚入龍樓每下
氣怡聲而問寢宜高穹之眷祐膺備福以延洪某叨奉
內祠欣逢盛旦稱觴東內莫陪羽翼之睽介壽南箕益

茂神明之祚

四

天潢宏疏遠之源克昌厥後日觀迎誕彌之旦長發其
祥慶溢青宮歡騰絳闕中賀恭惟皇太子殿下賢聖仁
孝濬哲溫恭延鶴禁之端人論經清夜被寵樓之盛服
問寢黎明宜洪造之儲休鞏皇圖而立本某欣逢寶運
叨處宰司葵藿向陽既聯趨於北面松椿介壽行躬造
於東朝

五

菊有黃花紀誕彌於厥月虹流華渚果載育於前星喜
均兩內之彤闈慶溢九重之青禁凡茲普率孰不歡呼
中賀恭惟皇太子殿下道德日躋聰明天賦事祖事父
戲玉陛之綵衣聞禮聞詩飽鯉庭之慈訓屆茲盛旦倍
擁繁禧某被眷實異常人報德未知其所身縻田野無
從捧霞液之觴目睇雲霄第深祝椿齡之筭

六

沆薤澄空光動前星之瑞
鬱葱浮闕榮開甲第之祥
誕日屆期溥天同慶
中賀恭惟皇太子殿下位隆儲副德茂元良祇慈訓於兩宮演仙源於萬世雍容主堯國本實賴以安清燕承顏天下陰受其福式臨穀旦咸祝椿齡
某賜老滄江馳誠禁掖衣冠入侍莫陪園綺之班霄漢遙瞻願踵勛華之壽

七

天開萬世之福聖應千齡之期
迺積慶基篤生儲嗣茲

屆誕彌之月輒伸祝頌之詞中賀恭惟皇太子殿下備
德元良賦資濬哲過庭得道茂緝熙之光明主堯成功
副清寧之眷佑式臨震夙之旦益擁鴻龐之休某投跡
山林繫心宮籞金壘玉爵阻趨稱壽之班鳳燭龍香居
有翰誠之所

正旦賀皇太子牋

萬彙潛通喜應三陽之泰一元資始肇迎六氣之和已
回暘谷之春式衍青宮之慶中賀恭惟皇太子殿下承

華豫悅毓粹孝純鶴禁儲精暉映紫宸之瑞龍樓問曉
光依麗日之明方茂對於昌辰宜誕膺於純嘏某叨塵
祠祿際遇熙朝遙瞻貳極之崇虔致千齡之祝

二

緹室飛灰應紫極履端之始皇家流慶屬青宮納祐之
初和感綿區歡騰輿頌中賀恭惟皇太子殿下天資仁
孝國本元良曉入龍樓瞻舜且重離之照春頒鳳曆適
義經交泰之時宜多福之永膺對三陽之昇進某班趨

楓禁躬獻椒觴阻修東內之賀儀第極南箕之善禱

三

南正授時布始和於歲旦東風應律延景貺於春宮慶
篤家邦歡同區宇中賀恭惟皇太子殿下懿文日就仁
孝天資燕寢問安美意祇承於二帝龍樓入對陰功密
蔭於羣生式臨交泰之期宜介履端之福某逖居草野
阻奉椒觴元旦載陽頓覺山河之麗前星炳照願齊箕
翼之光

冬至賀皇太子牋

清臺觀祲五雲已渙於叢霄候館呈工一縷初添於瑞
景履茲來復宜介繁禧中賀恭惟皇太子殿下志貫神
明德參穹壤身居鶴禁元良已正於萬邦觴奉神庭福
祉同祈於三聖某方膺寵命見具懇辭趨承莫遑於簪
紳祝頌徒勤於筆舌

二

寶曆迎和氣首三微之統清臺占瑞雲呈五色之輝慶

衍皇圖歡騰青禁中賀恭惟皇太子殿下天姿濬哲聖
質元良麗日重暉益著少陽之德前星炳耀永扶太極
之尊介茲來復之亨宜有履長之祉某夙蒙異遇幸際
昌辰莫陪東內之賀班第極南箕之善禱

三

五物書雲式兆有年之瑞三微紀月載欣至日之長集
景貺於兩宮衍蕃禧於貳極中賀恭惟皇太子殿下氣
鍾精粹資稟元良秉德至純以御陰陽之運觀時來復

灼知天地之心茂迎道長之辰益介川增之祉某叨塵
次輔幸際昌期筮跡丹墀方預稱觴之列馳誠青禁阻
修賀朝之誠

四

候紀青臺初奏微陽之肇啓觀形化國共欣麗日之舒
長衍慶祚於重闈錫宏林於內殿中賀恭惟皇太子殿
下稟資仁孝毓德粹溫觀象朋來日驗進修之益因時
剛復灼知動靜之心順履昌期宜膺純嘏副宸衷之眷

顧培國本之靈長某久託洪私倍深善頌大庭介壽方
入對於龍顏再拜稱觴愧阻趨於鶴禁

五

天統開端律早諧於鳴鳳乾元著始爰適應於潛龍慶
衍皇圖歡傳青闕中賀恭惟皇太子殿下性根仁孝德
表溫文問寢雞晨感祥雲之覆護論經鶴禁喜愛日之
舒長履茲來復之亨馴致交通之泰某丐歸晚景叨奉
內祠阻隨五彩之輶趨朝漢殿遙祝萬年之歷篤祐周

家

六

天上雲霄式紀觀臺之瑞地中雷復有開潛邸之祥中
賀恭惟皇太子殿下仁孝夙成溫文外著鞏玲圖而襲
慶撫至日以迎長燕侍龍樓歡奉兩宮之壽慶迎鳳歷
益滋百世之休某自遠禁嚴屢更節令方挂冠而謝事
徒戀闕以馳誠

除右丞相謝皇太子牋

昕朝敷命補揆席之久虛晚節叨榮愧瑣材之弗稱控
辭不獲被寵若驚中謝竊以昔在祖宗眷懷耆耄敏中
再入於祥符之際士遜復拜於明道之初皆以名臣克
膺異數如某者本無他技幸際明時始披霧於堯天旋
依光於舜日闕庭一去餘十五年經幄再陪既三數月
曾葺絲毫之報徒慚廩稍之糜縱未容田里之歸豈可
任鈞衡之重誤蒙宸眷復冒鼎司自惟有忝於前修何
以欽承於休命此蓋伏遇皇太子殿下仁無不愛寬足

有容凡寸長片善之不遺皆隱德陰功之所賜致茲衰
朽亦被甄收某敢不思副深知益堅素履中台所應託
前星有炳之光霖雨或施資少海上騰之澤

鄭峯真隱漫錄卷十九

欽定四庫全書

鄧峯真隱漫錄卷二十

宋 史浩 撰

牋

進玉牒加食邑拜回授轉官謝皇太子牋

典冊崇成丕顯邦家之慶恩章申錫慙無翰墨之勞懇
避弗俞祇承是懼中謝竊以統垂藝祖傳寶系之延洪
治盛仁皇闡大猷之赫奕洪惟盛世備輯成書編摩盡

出於諸儒莫施微力曲領偶兼於衆職首被殊私矧加
地以增封仍貶恩而及嗣有隆異數併逮私門茲蓋伏
遇皇太子殿下毓德粹溫稟資仁孝鑒觀家法慎思道
德之承雍睦內朝諦念宗夫之盛凡今日奏篇之稱善願
平時借力以居多是致孤蹤亦霑賞秩某敢不益堅晚
節無負私心萬戶疏封既坐叨於廩稍一門竊寵惟誓
竭於糜捐

賜第謝皇太子牋

克員宰輔方巧休閒賜第京師遽頌寵渥眷遇益隆於
丹宸推揚益自於青宮拜手祇承捫心懷感中謝伏念
某資惟樗櫟材匪棟梁粵當纂紹之初適有依乘之幸
夤緣超躡忝冒弼諧既莫效於涓塵旋上還於印綬自
去國而歸田里誠無地以起樓臺豈期垂暮之孤蹤迺
獲棲身於寧宇飄蓬靡定昔憐三逕之荒舉室就安今
得萬間之庇茲益伏遇皇太子殿下乾坤孕質宗社儲
休每當問寢侍膳之時常有舉善進賢之意陰使生靈

之類悉霑雨露之私是致悒悒猥加愚陋某敢不仰憑
鴻廕益勵孤忠屏迹江湖資少海無窮之潤依光日月
託前星有爛之輝

丐歸得請謝皇太子餞別牋

言歸田里告遠宮庭特頒燕餞之儀備極殷勤之意寵
踰望外榮曜朝中中謝竊以鶴禁宮堯龍墀密邇秋空
小雨頓滌煩襟午際羣山更浮佳氣虛堂清淨傑閣稜
層几案間周鼎商盤居深考古篋筥內牙籤玉軸不廢

觀書俯屈尊嚴偏容觀覽皇孫子女出侍兩旁綺席杯
觴喜令屢勸金甌既遺篚幣又將香茗出御府之珍肴
醕富慈闈之助誰云弱水能隔蓬萊宛似輕槎來登星
漢聽長生之妙訣洗平日之迷塵何以得之亦云幸矣
茲益伏遇皇太子殿下元良具德仁孝存心謂此暮途
衰病之夫曾是聖主初潛之客當年侍坐雅辱眷知今
日賜筵愈加眄睐某敢不深思規誨益養精神儻延紫
府之遐齡盡出青宮之大造其為報效罔替銘藏

生日謝皇太子賜物牋

萍梗孤蹤方獲故鄉之安處桑蓬賤日敢圖儲禁之寵
頒禮出非常感深莫喻中謝伏念某昨以腐儒之末學
蚤依聖上之潛藩每覘鯉庭得親犀表雅蒙眷待殊異
輩流洎輔弼之再塵已元良之正位不量足跡嘗造宮
庭荷眄睐之有加實措紳之莫及比作歸休之計曲蒙
燕餞之私玉立鳳雛交相勸揖篚將金幣備極榮華尚
俯記於生朝特遠馳於使驛龍蛇飛動温然一紙之春

風香茗芳鮮副以七箱之繡段珍錫來從於御府堵觀
喜溢於鄉闕疊被恩光若為報效茲益伏遇皇太子殿
下日勤文孝躬懋啟賢念慈父簪履之舊臣訪荒野
漁樵之真隱拜此盈庭之賜誠為希世之逢某敢不益
勵微衷仰銜大施五雲妙墨既欣異日之寶藏一辨名
香敬為今辰之知己

二

御府之珍儲宮所寶俯記桑蓬之日輒為枌梓之光萬

目觀瞻一詞贊歎凌兢拜貺感篆在心中謝伏念某自
揆孱庸適茲際會昔年朱邸獲款奉於英姿今日青宮
復曲蒙於異顧挂冠神武卧疾漳濱室湫隘而僅若盤
蝸門蕭條而直可羅雀敢意盈庭之瑞忽臨環堵之間
繒綵滿箱副之香茗雲烟溢紙重若珠璣被寵如斯酌
恩何所茲益伏遇皇太子殿下待人過厚燭理無遺念
君父簪履之微實國家鈞陶之舊遠馳渥賜來賁生朝
某敢不銘厥丹衷銜茲洪施已衰蒲柳尚勤香火之緣

唯祝椿松用作瓊瑤之報

三

蒼蒼脩齡方屆垂弧之旦珍芳多品遽盈環堵之居寵
耀鄉閭感深肺腑中謝伏念某夙叨眷遇晚獲退閒爵
既冒於三公年適登於八袞尊榮安富由君父生成之
恩吹獎挈提繫元良保佑之力敢意劬勞之日更形錫
予之私寶墨雲飛有舞鳳翔龍之勢使軺星動仰竒繒
賸馥之頌加賁袞蹤增光末路茲益伏遇皇太子殿下

雍容貳極烜赫前暉愛敬篤乎重闈及人之老慈仁憫
乎暮景與物為春遂馳御府之藏以侈寒門之慶某敢
不捫心仰戴頰首依歸賜實不貲表隆知於東內德何
以報祝遐筭於南箕

四

使驛遠揚馳春風之一紙儲闈厚賜燦內府之叢珍甫
生日以拜嘉激孺衷而增感中謝伏念某奮由寒族出
遇昌朝仰惟聖神文武之君宜得傑俊賢能之佐偶承

人之獲在選中身退而名茂彰年高而德不卽猶蒙宸
眷每錫壽儀茲承青禁之尊亦遺皇華之命茲蓋伏遇
皇太子殿下元良主器詩禮過庭體上方簪履之心軫
私室桑蓬之念縑盈箱篚香溢茗薰雖更年所之多愈
見恩情之渥致茲寵賚獨逮陳人某敢不祇佩至懷銘
藏卑悃桑榆暮景報莫效於勤勞松柏遐齡誠敢忘於
祝頌

五

英節輪蹄來從東內竒繒薰茗併出上方祇荷記憐彌
深感幸中謝恭惟皇太子殿下鍾靈厚地毓秀重霄孝
子忠臣行實全於一已陰功隱德澤已徧於四方念茲
衰老之蹤久在眷存之列斥叢珍之希世作寵命於生
朝某敢不敬拜榮光益堅耄景晨香暮火助景輝於前
星夕汐朝潮演層波於少海庶因勤祝少答隆私

明堂大禮加食邑謝皇太子牋

肅雍大祀既饗帝於七筵汪濊洪私遂推恩於四海豈

期增行猥及孱庸中謝伏念某向以沉痾莫陪顯相方
虞誅斥遽拜寵靈念浮食以投閒將挂冠而請老主睥
戶賦知所從來鶚薦衮裒實由推獎茲益伏遇皇太子
殿下至和格物純孝事親樂善在心得之愈多而不厭
待人惟舊念之雖久而不忘故使空飡亦叨異數某敢
不恪勤香火上報恩私庶因不息之誠少答無功之祿

除太保謝皇太子牋

恭被宸恩許還官政進冒公台之重不移齋鉞之崇感

激至於涕頤慚懼為之汗背中謝伏念某蚤逢上聖久
備近司海潤星暉每獲瞻於英表離明震豫幸親見於
昌辰陪密席之雍容拜摛文之鉅麗曠無前比允謂難
遭爰屢貢於忱辭方僅諧於歸志况叨榮於納祿之後
復召見於乞身之餘永言垂盡之頽齡併竊非常之誤
寵縉紳太息道路聳觀此蓋伏遇皇太子殿下純茂凝
姿溫仁成德每侍九重之閒晏曲憐一老之衰遲既容
扮社之遊更假槐庭之峻挂衣冠於魏闕已愧初心保

首領於首丘敢忘大賜

除太傅謝皇太子牋

上玉卮之萬壽已幸觀光進金鉉之次班亟聞錫寵雖
固辭而弗獲念承命以奚安中謝伏念某抱繫窮年彈
冠入仕功名未諧成就爵祿已極超遷位至公師任兼
將相每憐敬器戒滿側以懷憂豈意明綸忽登崇而作
傅初無汗馬遽亞維垣靖言僥冒之優蓋有夤緣之自
茲益伏遇皇太子殿下聰明天賦誠敬日躋前星映兩

曜之華少海蓄百川之潤繩其祖武安樂延億載之祺
貽厥孫謀元良輩一人之正當問寢過庭之際盡推賢
助國之端遂令衰朽之姿仰拜光榮之賜某敢不益堅
晚節遠企前修儻溝壑之未填敢忘大賜期桑榆之尚
緩可報隆知

賜玉帶謝皇太子牋

寶帶萬釘飾瓊瑰而敷錫緹衣十襲宜緘鏘以珍藏敢
意矜憐特容佩服得既踰於望外感實倍於胷中 中謝

伏念某韋布諸生草茅寒族幅巾謝事念已挂於冠裳
承詔入班幸粗勝於簪笏豈謂軫優隆之天眷昇璀璨
之身章揣已無堪歸心有自茲益伏遇皇太子殿下元
良以正道義彌尊隱德陰功四海咸承於衣被瑣材弱
植一生尤荷於獎提致此光榮猥加疲茶某敢不深懷
銘鏤益謹護持束以立朝既難施於趨進歸而在野又
茂報於恩私唯勤香火之緣仰祝松椿之壽

謝皇太子送行詩牋

一緘珠玉煌煌李杜之文光滿幅雲煙赫赫鍾王之筆
陣遠馳驛騎來界蝸廬榮動搢紳歡傳里巷中謝恭惟
皇太子殿下聰明天賦道德日躋象管生花縹渺仙人
之夢絳囊佩錦雍容長吉之游宅心忠孝之餘寓意風
騷之作某夙蒙異眷每荷寵褒茲因慶壽於重闈遂獲
伸誠於東內告歸故隱俄錫新篇豈惟增耀於一身抑
亦彰名於萬古某敢不珍藏十襲寶竝六經播在寰瀛
更擬勒之金石揆諸老景居慙報以瓊瑶

生日謝皇太子賜物牋

命出青宮馳一緘之妙墨光分紫禁錫三種之珍藏厚

意所將牢辭弗獲

中謝

恭惟皇太子殿下仁明獨著忠

孝兩全正笏垂紳出贊聖君之化育過庭問寢入供人
子之晨昏不有其功退藏於密軫念靡遺於簪履施恩
每及於田廬故此竒繒薌茗之頒忽作寒鄉蓬蓽之瑞
播紳歆豔族屬感銘已迫桑榆莫效珠環之報尚勤香
火仰延龜鶴之年

鄭峯真隱漫錄卷二十

欽定四庫全書

鄮峯真隱漫錄卷二十一

宋 史浩 撰

王府撰述

普安郡王上皇后生辰詩

瑞氣擁叢霄椒房載誕朝露餘秋半重月近下弦饒赤
伏扶東漢清風表內朝詩書勤有味儉朴富無驕翠輦
慈寧侍霞裾帝所招祥開三島宴歡動六宮謠繡綺張

堯屋笙竽合舜韶仙桃金母獻丹桂素娥飄皇厯推難
老朱顏共不凋瑤觴稱萬壽歲歲拱峇堯

普安郡王辭免除使相封建王表

恩綸忽播斷自宸衷禮典驟隆駭聞衆聽輒貢由衷之
悃冀推從欲之仁中謝伏念臣夙以穉蒙誤膺鞠育膝
下日漸於訓誘胷中每愧於昏冥逮親外傳以橫經更
款內庭而聞禮粗知向學已屢叨榮雖在父慈恩愈隆
於天地其如子道效未展於涓塵遽更鉅鎮之麾幢仍

昨真王之爵土視儀揆路衍賦轅田惟茲異數之駢加
益重瑣材之非據而况皇帝陛下方隆責實之治大嚴
信賞之科苟或私親將誰勸善伏望公衡平施哲鑒旁
昭亟追寢於誤恩俾姑安於舊識儻雨露之澤不偏厚
於閨門則日月之光自無虧於寰海

又謝表

父子之恩素洽斯欲正名爵祿之寵彌隆益為過分俸
非可覲心不遑安中謝伏念臣資匪過人志惟務學每

慙譎薄曲荷生成論私恩則天地難名叙感戴則筆舌
奚既方懼寵章之太渥何期縉典之遽頒沃壤連阡陪
厚土田之賜真王胙國復兼將相之權揣稱奚堪控辭
弗獲退惟忝冒彌積凌兢茲益伏遇皇帝陛下道貫三
靈化周四海宅乎清淨灼知治亂之原斷以剛明務壯
本文之勢致茲盛舉猥速非材臣敢不仰體聖懷恪遵
慈訓此生事主竭忠孝於一心他日承顏期弟兄於百
數

普安郡王謝賜玉帶表

王人荐至聖德愈隆荷綸語之丁寧賜章身之璀璨撫躬非稱拜賜增慙中謝臣竊以束帶立朝本臣子之常分於玉比德出國家之異恩自惟甚愚何以堪此茲益伏遇皇帝陛下至仁澤物大度匿瑕故惟追琢之珍以飾凡庸之質臣敢不仰思洪施俯勵丹衷欽以自新不越準繩之內寶其無玷庶昭君父之恩

又謝面賜玉帶表

榮瞻黼座方諧就日之誠寵佩身章獨奉截肪之賜束
而端拜愧不勝言中謝竊以君之視臣以解衣而知意
厚父之愛子亦解帶以示恩隆矧復飾以英瑤傳之華
袞有何尤異冒此寵榮茲蓋伏遇皇帝陛下睿眷有加
誠心不息欲羣工之改觀畀珍御以增輝臣敢不仰懷
臨授之恩深體教忠之意自知報德惟有竭身

又謝賜鞍馬表

仁心惻怛俯憐子職之勤寵數便蕃遽出帝閑之駿蒙

恩至渥行道有輝中謝伏念臣猥自叨踰每防驕逸惟
是晨昏之間少殫奔走之勞何意施發乾龍錫先晉馬
材既推於駮駟飾竝燦於纓鑣退揣無功實惟非據茲
蓋伏遇皇帝陛下化鈞子育愛軫天矜特頒清駿之姿
以代馳驅之役臣敢不恭承君命仰體父慈養志為先
敢徒須於駕馭竭身以報庶或罄於疲駑

建王上皇后生辰詩

誕節秋強半扶輿靄瑞煙鯨江潮罷弄星漢月將弦母

德施隆載陰功洽普天芻蕘資務本卷耳助求賢嘉頌
來宮內歡聲溢帝前眈眈登邃殿楚楚秩初筵列侍環
珠簾清歌卻管絃金英浮壽客丹頂舞胎仙願諧君父
祝同享萬斯年

建王辭免明堂大禮加恩劄子

臣猥以凡姿陪茲釐事仰玉佩珠旒之戾止慶雲車風
馬之博臨獲與盛儀已為過幸更增真賦豈所宜蒙伏
望皇帝陛下曲軫聖慈俯昭愚分亟追還於渙命庶少

逴於師言

又辭免表

槐庭誕告真錫戶租葛悃瀝辭未回天鑒敢伸再瀆冀
徹九重中謝伏念臣生本巖蒙居懷祇惕屬逢上聖創
舉彌文即合宮王政之堂展周家宗祀之禮帝親降格
乾乾本自於一人蓮豆靖嘉濟濟率由於多士濫尸亞
裸敢意加封假設微臣遽拜此恩必謂陛下獨私其子
是因小已仰累大公伏望皇帝陛下廣運堯天明開舜

日深鑿伐檀之刺勿辭反汗之嫌儻使閨門霑澤不譏於偏厚庶幾寰宇輸忠盡底於忘勞避寵命以循牆俟俞音而踏地

又第三辭免表

睿澤誤敷既非愚衷上瀆遂至於三惟茲自見以甚明期於得請而後已中謝伏念臣賦姿雖鄙遭世寔昌夙稟義方粗知分守重念茲恩之渥其將何德以堪屢控懇辭未蒙孚允豈益高之天聽忘有欲之人心良由禱

意弗堅故乃俞音尚閔矧總章之成禮宜宣室之受釐
儻欲均其餽餘盍亦捨其嗣息庶幾此惠雅盡至公伏
望皇帝陛下由義斷恩察情非偽必反告廷之命用昭
知子之明空臆籲天企踵待命

又謝表

禮行重屋方翁受於蕃釐恩錫羣工爰駮頌於列邸懇
辭弗獲銜愧無窮中謝伏念臣材不逮中識難語上承
顏六寢謬處長男歲事九筵叨塵亞獻仰止聖人之饗

載欣緝典之誠敢意天恩遽加井賦連阡既廣負乘居多茲蓋伏遇皇帝陛下保民而王肆類於帝謂致孝莫大於嚴父式講上儀謂歛福當錫厥庶民爰敷大需致茲瑣質亦荷殊私臣敢不祗服聖謨益虔子職字而知孝得於觀感之間食不違仁誓以捐糜而已

建王謝移鎮加恩表

宣室受釐惠復均於列辟洪都易鎮榮併錫於真租更敷出綈之言莫許循墻之避凌兢拜命揣度懷慚中謝

伏念臣猥以凡姿與茲熙事刺經作王制朝方講於上
儀宗祀於明堂身獲陪於亞獻惟帝親之降格本神聖
之度共方欣緝典之成敢意洪恩之洽肆易齋壇之節
徃當天寶之區增畀戶封庸昭帝眷永念伐檀之刺彌
深負乘之憂茲蓋伏遇

云云
同前

建王免出征先行劄子

臣比者恭聞陛下以敵勢猖獗減膳避殿臣坐不安席
食不甘味竊思蒙昧徒有比身不能為君父少施寸力

以寬聖慮是以不避天誅請因聖駕親征荷戈前驅率
勵將士捐軀以報厚恩誠出一時之情不思陛下所以
望臣者在於此臣今思之實是過言恭惟陛下親御六
軍蒙犯霜露六宮不隨行扈從之真誰當親近臣為陛
下子飲膳湯藥臣不在左右其將誰任其責以是論之
臣決不可先行況今陛下委任將相尚未有成功臣今
綿力又何能為是用冒急上聞以改前說伏乞陛下赦前
言之失知臣前日獻言激人臣之忠今日悔過盡人子

之義則臣區區之心庶乎可白矣

又上皇后劄子

臣昨以國家多事爹爹陛下焦勞臣以一時忠憤所激
遂具劄子請先效命乞媽媽聖人為達此意蒙聖慈委
曲思慮所以保全回護甚至臣實深感恩臣今思之前
言甚失萬一爹爹陛下親征臣為人子安可不在左右
况臣材能不逮諸將設有委使將來必致踈闕今有劄
子一封力陳悔過伏望媽媽聖慈更賜籌度如當時曾

奏知爹爹陛下即此劄便乞敷奏如或前劄未達亦吾
媽媽聖人周旋保苾庶幾臣改過之誠上達天聽少得
自安

建王謝賜玉帶笏記

對揚楓陛咫尺龍顏錫寶帶之萬釘燦良珍之九德光
華溢目感媿兼懷

面賜玉帶謝皇后笏記

感鴻私而入謝錫寶帶以增榮仰荷坤儀肆加賁飾載

循僥冒深切戰兢

又謝賜玉帶笏記

命出層霄帶橫寶玉顧無功而被寵徒揣己以增慙

賜玉帶謝皇后笏記

比荷母辭肆加帶飾服侈無瑕之寶愧增有覲之顏

又謝面賜玉帶鞍馬笏記

帶佩玉紋駟馳寶勒荷大庭之臨賜撫小己以震驚

面賜玉帶鞍馬謝皇后笏記

玉帶垂魚金羈控策拜外庭之榮寵荷中殿之恩慈

又謝正日解玉帶面賜笏記

天顏咫尺寶帶焜煌揭大賜於廣除激危衷之至感

謝正日面賜玉帶謝皇后笏記

適覲龍顏荷頒玉帶眷言賁飾之寵實由坤載之私

建王賀天申節笏記

三靈洽慶夙開統電之祥萬玉通班咸罄後天之祝矧
居子道尤喜親年化日舒長庶彙既均於椿蔭仁風鼓

舞徵生永遂於萊嬉

又賀皇后生辰笏記

萬寶慶成六宮騰頌爰祝無疆之筭以符載誕之辰效
法齊天久視青霄之日月承顏戲綵願為白髮之兒童

建王辭免升儲劄子

臣賦質庸鄙遭世盛明事父事君曾未殫於忠孝荷恩
荷寵已備極於光榮敢謂更沐皇靈驟陞儲貳內量已
德既空乏以難勝外考人言將沸騰而不止伏望皇帝

陛下睿明深燭渙號亟收庶使愚衷獲安舊秩

又辭免表

中頒詔旨益出聖心退休寵榮莫安愚分敢伸再瀆上
扣九重中謝臣聞少海波澄源從巨浸前星光潤象拱
太微歷觀隆盛之朝必重元良之舉所宜著德允協具
瞻伏念臣生也甚愚長亦無取徒依慈蔭疊冒恩光昨
土建旄將相之階已極承顏順色愛欽之道未優第懷
兢懼之心蔑有紛華之慕今者誕揚制綍肇建儲闈寵

以更名俾之勝任丹懇亟輸於誠意清宸尚閱於俞音
雖陛下愛子之心有加無已在微臣揣已之分何德以
堪伏望皇帝陛下天地有容日月其照察臣素無矯偽
知臣已極叨踰丞裁門內之恩少逭天下之議誓尋舊
學以報洪私

又第三辭免表

荐貢忱辭期止青宮之建未回淵鑒復輸丹悃之私中
謝臣聞無功受祿者見刺於詩人惡盈好謙者垂規於

易旨苟違此理雖得奚安伏念臣生覆載之間荷顧復之賜爰從稚齒未施尺寸之技能已被宸恩久冒崇高之富貴官居極品爵祚真王靜言及茲良以為懼豈意龍廷敷告鶴禁宏開雖懷苟得之心敢冒疾顛之戒伏望皇帝陛下仁風溥博智日昭融運獨見之剛發至公之斷不以愛子之意有累知人之明憫其忱誠賜以矜允儻容竭力俾專問寢之晨昏願止誤恩姑緩升儲之

歲月

又謝表

風雷渙發屢輸非據之辭天地恩隆未寢惟行之令寵
知上出感自中深中謝臣聞大人繼明見乎離長子主
器出乎震漢文預建時惟享國之長周武師行老有奉
親之樂莫不皆騰茂實始正元良伏念臣量乏淵冲材
非玉裕每愧寵榮之昇獨因鞠育之私將相侯王濫吹
非酬於功德詩書禮樂潛心未究於指歸何以祇奉綸
言驟升儲禁茲益伏遇皇帝陛下凝圖丕赫受命溥將

仰承宗祏之休敷求裸鬯之助聖謨中定靡由大臣近侍之謀闕典肇稱非采議郎博士之奏命由獨斷恩出殊常臣敢不俯勵丹衷虔遵睿訓冬溫夏清雖竭報於生成幼學壯行誓無忘於忠孝

普安郡王恩平郡王薦顯仁太后黃籙青詞

洪造難名靡聞私福真科有法可援冥途輒傾懇切之誠仰動妙冲之鑒伏念臣等姿從稚弱運偶休明式聯宗屬之邇班逮事吾君之壽母恩惟海嶽報未絲毫俄

空長樂之闡遽上層霄之路雖生逢慈儉曾無歉於仁
心而去即逍遙尚有祈於道力是用叩三境玉皇之聖
演九幽金籙之文建彼法橋助茲靈馭伏冀龍興雷動
羽仗星馳肸鬩遐臨導神遊於帝所鴻龐下需綿寶曆
於皇圖誓竭微表上酬大賜

建王醮宅青詞

天道無私故能善貸神心可格厥有至誠謹殫祗禱之
衷上動聰明之鑒伏念臣生即叨於榮寵居已愧於高

明比鳩土木之工實銜君父之賜因基革故指日落成
仰止珠躔燦森羅之象綿俯思基壤環窟宅之神靈方
當興作之時寧免震驚之咎儻忘愧謝曷遂妥寧用即
良辰肆嚴淨供瓊篇葉笈爰備演於仙儀鳳蹕龍輿冀
遐周於塵宇庶昭一念永錫百祥風雨震零已享旻
之賜門闌靜謐尚資覆幬之恩誓竭忠勞仰酬眷佑

又顯仁皇后小祥黃籙青詞

三境玉京俱闡慈悲之教九幽金籙是為拔濟之科輒

控危衷仰板至鑒伏念臣自從幼稚逮事慈寧荷大母
之劬勞極聖時之眷寵邈矣遐霄之往奄然新穀之升
懷德罔窮寓哀無所敢憑道力上助仙遊伏願鳳蹕龍
輿降泆寥之神馭玉書丹篆援冥漠之修塗享快樂於
諸天昇安榮於丕祚誓殫末景仰答大恩

鄭峯真隱漫錄卷二十一